

Rächtebach-Lied

Es leit im schöne Spessartwald e Dörfle dort im Täl;
Das Dörfle is ma Rächtebäch, mer kennts ja überall.

Es git ke Sähenswürdigkeit in unnerm Dörfle klee,
Mir hön bloß unnerm Rächtebäch, do brauche mer ken Mee!

Mir genn no wie zu alter Zeit mit Kötze naus der Bäär,
Mir holle Schträä un Holz im Wald, das frät die Förschter sähr.

Es weht ba uns als aa emol en rächte rauhe Wind,
Wanns äwer der Kirchegöökkel merkt, no dreht er sich geschwind.

O lieber naa! O lieber naa! Ich sags die ganze Zeit:
"Es geht nix über Rächtebäch unn seine bräve Laüt!"

Etz hön mer aa e Schwesternhaus do dowe uff em Barg,
Was geht do für en Sääche aus, ihr Laüt, das is ganz ärch.

Unn hangt uns Ärcher, Schmarz un Groll so rächt bis owe raus,
Do gehts der Weickertswiese nuuf: Die gute Luft blösts naus.

Sie blösts bis naus em Frankeland, blösts über alle Bemm;
Unn senn mer dann vergnücht un froh, no gemmer widder hemm.

Wie das Rächtebäch-Lied entstanne is.

1951 wärsch. Ich hå mich immer e weng um die Jugend gekümmert. Mir hatte gräd Heimowerd, so e rächt läwendige Mädlesgruppe. Mir hönn garn gesunge un Theater geschpielt. Es war immer rächt schöö.

Do hömmer emol in em Liederbuch e Lied vom Schwäweland funne. "Ouw, das deet schöö uff Rächtebäch päß, das singe mer. Gut, ich haas der Mädlich eigelarnt. Mir höns a e ganze Wäl gesunge.

No haich emol gesächt: "Ächendlich is das ni räächt, daß mer uns Text un Melodie von em annern klaue. Mir höns a gar ni nödich. Mir könne uns doch selwer e Lied gemäch." "Ouw ja, das mache mer." All warnse begeistert. Etz is losgange: "Was hömmer dann alles in Rächtebach?" "Ja", sag ich, "Mir hönn bloß unnern Rächtebach!" Gleich seecht die Rosemarie: "Do brauche mer kenn Mee." "Awer en schöne Kirechegöökkel hömmer, unn mir senn die Rächtebacher Bäärkötze- unn mir genn naus em Waald unn holle Holz un Laab - unn die Förschter sänn uns ni so garn im Wald - Ja un unnern Schpezialausdruck muß uubedingt nei: O Liewer oder o liewer naa (die Löhre Mopper hön als immer gesacht: die O Liewerlich kumme) -- so is hie un har gange, es wär e wähere Prächt.

No ja, ich ha derno no e wenk verzeht, mir hönn e Päär Liedlich gesunge, no semmer hemm.

Derhemm hoich mich hiegesetzt un hå däs Liedle draus gemacht. Die erschte fünf Strophe. Aus dem alte Schwäwelandliedle hömmer äwer no e Sctrophe derzu genumme, do hönn die Mädlich nimm druff wölle verzicht: Mei Rächtebach, das is man Scholz, ma Frääd, man Sunneschei, Unn, daß ich en Rächtebächer bin, do bild ich mer äbbes ei! Die singe mer als sechste Sctrofe. Äwer die sctammt ni von mir. Ich hås ni üwers Harz gebrocht, daß ich gesächt hå, di Sctrofe dörfte nimm sing. Die letzte drei Sctrofe senn schpeter entschtanne. Die Weickertswiese muß uubedingt no nei, hots gehäße.

Die Melodie hot uns der Herr Waldemar Hauck gemächt, bei dem häich domols Musikunnericht genumme.

Unn zeit dere Zeit würd däs Lied begeistert gesunge.

Däs is also die Geschichte vom Rächtebäch-Lied.

Zum erschemol hömmer das Lied on der Kirb 1951 gesunge.